

Mud Volapüka

Nüm 14

8 yulul 2016

Rubrig gramatik

Ab

Konyun „ab“ yümon setis tel notükölo taädami (taami) onas, jonon das:

1) toä lepük seta balid lepük seta telid i vobedon (dunodon);

ston efaon sui kap obik **ab** no esufob dämi bi älenlabob lehäti

bumik = **toä das** ston efaon sui kap obik, no esufob dämi bi

älenlabob lehäti bumik = ston efaon sui kap obik **ab** älenlabob lehäti

bumik e klu esufob dämi nonik

iglobob reinajelömi tö dom **ab** läbo rein no ijenon e no iluimikob =
no iluimikob **toä** iglobob reinajelömi tö dom bi rein no ijenon

2) lepük seta balid vobedon (dunodon) te stipä lepük seta telid;

ugevob ole buki at **ab** *if* okondötölöv gudiko = ugevob ole buki at

stipä te *if* okondötölöv gudiko

ubläfob bligi ole **ab** *pos* dagetam (getam) lemeseda fovik obik =

ubläfob bligi ole **te** *pos* dagetam lemeseda fovik obik

Abi

Konyun „abi“ binon koboyümavöd vödäs „ab“ + „i“:

vat *no te* binon lektinadugian **abi** hitasiolöm gudiks = vat binon lektinadugian gudik **ab i** hitasiolöm gudik = vat binon lektinadugian **ed i** hitasiolöm gudiks

Noet: „abi“ mödadilo pagebon kobo vöd „noe“ („no te“).

vat *noe* binon lektinadugian **abi** hitasiolöm gudiks = vat *no te* binon lektinadugian **ab i** hitasiolöm gudiks

binom *noe* calasvist **abi** flen gudik obiks = binom *no te* calasvist obik **ab i** flen gudik obik = binom calasvist **ed i** flen gudik obiks

Ad

Präpod „ad“ jonon diseini, lükömöpi duna e pagebon pos värbs **ön nenfümbidir** u subsats:

man ecöpom boadi **ad** *dileds* = man ecöpom boadi **dat** *ramenön diledis*

ulevokoy yunanis **ad** *dünäd* = yunans kelis ulevokoy *odünädoms* = yunans kelis ulevokoy *omutoms dünädön*

gebof papüri **ad** *penam* = gebof papüri **pro** *penam* = gebof papüri **ad** *penön*

vüdobs omis **ad** *lotans* = vüdobs omis **as** *lotans* = vüdobs omis **ad** *olotoms*

ad *kis vilol-li moni at?* = **pro (dub)** *disein kinik vilol-li moni at?* = *kikodo vilol-li moni at?*

edunom osi **ad** *trod ofa* = edunom osi **bi ebüocedob das atos**

ütrodon ofi = edunom osi **ad** *trodön ofi*

ävilons dugälön obis **ad** *tidans* = ävilons dugälön obis **dat**

uvedobs *tidanus*

cödan ecödetom omis **ad** *deadapön (omis)* = cödan ecödom das
binoms döbik e **zesüdos** *deadapön omis*

binof tu bäldik **ad** *matikön* = binof tu bäldik **e sekü atos** *no kanof
matikön*

kanitom **ad** *takedükön oli* = kanitom **desino dat** *takedükön oli* =
kanitom **bi cedom das** *kanit utakedükön oli*

no kanob sufälön **ad** *logön omi suföli* = no kanob sufälön **ven**
logob omi suföl

etädob fleni okik **ad** *flapön omi* if no ubläfomöv debi okik obe =
etädob fleni okik **das** *oflabob omi* if no ubläfomöv debi okik

Noet: präpod „ad“ neai kanon pagebön pos yufavärbs fovik, pos
kels nenfümbidir suimon - bleibön, büedön, dalön, jinön, kanön,
klülädön, koedön, leadön, lielön, loegön, mutön, nedön, sötön, vilön.

Sams:

„ebüedoms kömön omi“ plas „ebüedoms omi ad kömön“

„mutob golön lomio“ plas „mutob ad golön lomio“

Sevols-li, das ...

Filipuäns



1) Repüblikän Filipuänas binons län tö Siyop Sulüdalofüdik ä ragipelag binädöl se nisuls 7107 tö Pasifean. Län pazüon fa Indonesän, Malaysän, Palauäns, Taivän e binon tat gretikün kel no labon mieds su tail ko läns nilädik (nilädans) okik.

2) Nü sis yel 1521 jü yel 1898 Filipuäns gebidons de (pimastons fa) Spanyän. Tän län pimaston fa Lamerikän (dub krig Spanyän-Lamerikänik, sekü kel Spanyän igividon Lamerikäne Filipuänis, Kubanäni, Guamäni e Puertorikeänis). Libi okik Filipuäns idagetons ün yel 1946 pos volakrig telid göliküno se läns valik votik Siyopa Sulüdalofüdik.

3) Püks calöfik läna binons Filipuänapük e Linglänapük, ab i püks votik plu tum pagebons. Filipuäns ön mödot lödanas plu tumbalion binon län teldegid länas pöpagikün e län kilid bevü tats Linglänapükik.

4) Nemi okik län isivon danädü hireg Spanyänik el ‚Felipe II‘.



5) Stän Filipuänas binon flag balik su kel köls kanons pladikön pladi okik: ön krig taned löpik vedon redik e taned donik – blövik, ön püd – taädo.

6) Filipuäns palecedons as „cifazif vödemik vola“. Aldeliko gebans telefonöma polovik kildeglulbalion tö Filipuäns lovesedons tüi vödanunils brefik (els ‚SMS‘) foltummuldegbalion. Atos binon plu ka mödot valodik vödanunilas brefik aldelik palovesedöl tö Lamerikän e Yurop kobo.

7) To ced pöpedik, el ‚karaoke‘ pidatuvon tö Filipuäns fa hiel ‚Roberto del Rosario‘, no tö Yapän. Inemom oni el „Sing-Along-System“ („Kanitölös kobo sit“), nem el ‚karaoke‘ isüikon latikumo e sinifon ma Yapänapük „kanitam nen duced“.

8) Tö Filipuäns matiteils e ropams groda paproibons.

9) Cifazif Filipuänas el ‚Maynila‘ binon zif tupöpagikün vola. Is mens dub def spada libik lödons igo in sepülemöps.

10) Pluamanum Filipuänanas kelabons tutakremi e tutikefi, kefons tutis okik alna pos fidäd.

11) Lampad flüorätik pidatuvon fa nolavan Filipuänik hiel ‚Agapito Flores‘.



12) Pledadin vönaoloveik Filipuänik el ‚yöod‘ büo pägebön as vaf.

13) Filipuäns binons motedalän daluvalalifavana jiel ‚Roseli Ocampo-Friedmann‘.



Säkis, küpetis e lofotis aliks ä materis e volanuns nitediks kanols lüsedön lü penedabog «komunan@yandex.ru».